

華  
氏  
中  
藏  
經

華氏中藏經序

應靈洞主探微真人少室山鄧處中撰

華先生諱佗字元化性好恬淡喜味方書多遊名山幽洞徃徃有所遇一日因酒息於公宜山古洞前忽聞人論療病之法先生訝其異潛逼洞竊聽須臾有人云華生在通術可付焉復有一人曰道生性貪不憚生靈安得付也先生不覺愈駭躍入洞見二老人衣木皮頂草冠先生躬趨左右而拜曰適聞賢者論方術遂乃忘歸况濟人之道素所好爲所恨者未遇

一法可以施驗徒自不足耳願賢者少察愚誠乞與  
開悟終身不負恩首坐先生云術亦不惜恐異日與  
子爲累若無高下無貧富無貴賤不務財賄不憚勞  
苦矜老恤幼爲急然後可脫子禍先生再拜謝曰賢  
聖之語一一不敢忘俱能從之二老笑指東洞云石  
牀上有一書函子自取之速出吾居勿示俗流宜秘  
密之先生時得書回首已不見老人先生懾怯離洞  
忽然不見雲奔雨瀉石洞摧塌既覽其方論多奇怪  
從茲施試效無不存神先生未六旬果爲魏所戮老

人之言預有斯驗余乃先生外孫也因弔先生寢室  
夢先生引余坐語中藏經真活人法也子可取之勿  
傳非人余覺驚怖不定遂討先生舊物獲石函一具  
開之得書一帙迺中藏經也予性拙於用復授次子  
思因以志其實甲寅秋九月序

華氏中藏經卷上

漢 譙 郡 華 陀 元 化 撰

人法於天地論第一

人者上稟天下委地陽以輔之陰以佐之天地順則  
人氣泰天地逆則人氣否是以天地有四時五行寒  
暄動靜其變也喜爲雨怒爲風結爲霜張爲虹此天  
地之常也人有四肢五臟呼吸寤寐精氣流散行爲  
榮張爲氣發爲聲此人之常也陽施於形陰慎於精  
天地之同也失其守則蒸而熱發否而寒生結作癭

瘤陷作癰疽盛而爲喘滅而爲枯彰於面部見於形體天地通塞一如此矣故五緯盈虧星辰差忒日月交蝕彗孛飛走乃天地之災怪也寒暄不時則天地之蒸否也土起石立則天地之癰疽也暴風疾雨則天地之喘乏也江河竭耗則天地之枯焦也鑿者決之以藥濟之以鍼化之以道佐之以事故形體有可救之病天地有可去之災人之危厄死生稟於天地陰之病也來亦緩而去亦緩陽之病也來亦速而去亦速陽生於熱熱而舒緩陰生於寒寒則孝急寒邪

中於下熱邪中於上飲食之邪中於中人之動止本  
乎天地知人者有驗於天知天者必有驗於人天合  
於人人法於天見天地逆從則知人衰盛人有百病  
病有百候候有百變皆天地陰陽逆從而生苟能窮  
究乎此如其神耳

陰陽大要調神論第二

天者陽之宗地者陰之屬陽者生之本陰者死之基  
天地之間陰陽輔佐者人也得其陽者生得其陰者  
死陽中之陽爲高真陰中之陰爲幽鬼故鍾於陽者

長鍾於陰者短多熱者陽之主多寒者陰之根陽務其上陰務其下陽行也速陰行也緩陽之體輕陰之體重陰陽平則天地和而人氣寧陰陽逆則天地否而人氣厥故天地得其陽則炎熾得其陰則寒凜陽始於子前末於午後陰始於午後末於子前陰陽盛衰各在其時更始更末無有休息人能從之亦智也金匱曰秋首養陽春首養陰陽勿外閉陰勿外侵火出於木水生於金水火通濟上下相尋人能循此永不湮沉此之謂也嗚呼凡愚豈知是理舉止失宜自



致其懼外以風寒暑濕內以饑飽勞役爲敗欺殘正  
體消亡正神縛絆其身死生告陳殊不知脉有五死  
氣有五生陰家脉重陽家脉輕陽病陰脉則不永陰  
病陽脉則不成陽候多語陰症無聲多語者易濟無  
聲者難榮陽病則旦靜陰病則夜寧陰陽運動得時  
而行陽虛則暮亂陰虛則朝爭朝暮交錯其氣屢積  
死生致理陰陽中明陰氣下而不上曰斷絡陽氣上  
而不下曰絕經陰中之邪曰濁陽中之邪曰清火來  
坎戶水到離肩陰陽相應方乃和平陰不足則濟之

以水母陽不足則助之以火精陰陽濟等各有攀陵  
上通三寸曰陽之神路下通三寸曰陰之鬼程陰常  
宜損陽常宜盈居之中者陰陽勻停是以陽中之陽  
天仙賜號陰中之陰下鬼持名順陰者多消滅順陽  
者多長生達斯妙趣無所不靈

生成論第三

陰陽者天地之樞機五行者陰陽之終始非陰陽則  
不能爲天地非五行則不能爲陰陽故人者成於天  
地敗於陰陽也由五行逆從而生焉天地有陰陽五

行人有血脉五臟五行者金木水火土也五臟者肺  
肝心腎脾也金生水水生木木生火火生土土生金  
則生成之道循環無窮肺生腎腎生肝肝生心心生  
脾脾生肺上下榮養無有休息故金匱至真要論云  
心生血血爲肉之母脾生肉肉爲血之舍肺屬氣氣  
爲骨之基腎應骨骨爲筋之本肝系筋筋爲血之源  
五臟五行相成相生晝夜流轉無有始終從之則吉  
逆之則凶天地陰陽五行之道中含於人人得者可  
以出陰陽之數奪天地之機悅五行之要無終無始

神仙不死矣

陽厥論第四

驟風暴熱雲物飛颺晨晦暮晴夜炎晝冷應寒不寒  
當雨不雨水竭土壤時歲大旱草木枯悴江河之涸  
此天地之陽厥也暴壅塞忽喘促四肢不收二腑不  
利耳聾目盲咽乾口焦舌生瘡鼻流清涕頰赤心煩  
頭昏腦重雙睛似火一身如燒素不能者乍能素不  
欲者乍欲登高歌笑棄衣奔走狂言妄語不辨親疎  
發躁無度飲水不休胸膈膨脹腹與脇滿悶背疽肉

死寒之又寒熱之又熱者生金匱大要論云夜發寒者從夜發熱者逆晝發熱者從晝發寒者逆從逆之兆亦在乎審明

虛實大要論第八

病有臟虛臟實腑虛腑實上虛上實下虛下實狀各不同宜深消息腸鳴氣走足冷手寒食不入胃吐逆無時皮毛憔悴肌肉皺皺耳目昏塞語聲破散行步喘促精神不收此五臟之虛也診其脉舉指而活按之而微看任何部以斷其臟也又按之沈小弱微短

濡軟俱爲臟虛也虛則補益治之常情耳飲食過多大小便難胃膈滿悶肢節疼痛身體沈重頭目昏眩唇腫脹咽喉閉塞腸中氣急皮肉不仁暴生喘乏偶作寒熱瘡疽并起悲喜時來或自痿弱或自高強氣不舒暢血不流通此臟之實也診其脉舉按俱盛者實也又長浮數疾洪緊弦大俱曰實也看在今經而斷其臟也頭疼目赤皮熱骨寒手足舒緩血氣壅塞丹瘤更生咽喉腫痛輕按之痛重按之快食飲如故曰腑實也診其脉浮而實大者是也皮膚搔癢肌

肉膈脹食飲不化大便滑而不止診其脉輕手按之  
得滑重手按之得平此乃腑虛也看在何經而正其  
時也胃膈痞滿頭目碎痛飲食不下腦項昏重咽喉  
不利涕唾稠粘診其脉左右寸口沈結實大者上實  
也頰赤心忪舉動顫慄語聲嘶啞唇焦口乾喘乏無  
力面少顏色頤頷腫滿診其左右寸脉弱而微者上  
虛也大小便難飲食如故腰腳沈重臍腹疼痛診其  
左右手脉尺中脉伏而澀者下實也大小便難飲食  
進退腰腳沈重如坐水中行步艱難氣上奔衝夢寐

危峻診其左右尺中脉滑而濇者下虛也病人脉微  
澁短小俱屬下虛也

上下不寧論第九

脾病者上下不寧何謂也脾上有心之母下有肺之  
子心者血也屬陰肺者氣也屬陽脾病則上母不寧  
母不寧則爲陰不足也陰不足則發熱又脾病則下  
子不寧子不寧則爲陽不足也陽不足則發寒脾病  
則血氣俱不寧血氣不寧則寒熱往來無有休息故  
脾如癰也謂脾者土也心者火也肺者金也火生土



土生金故曰上有心母下有肺子脾居其中病則如斯耳他臟上下皆法於此也

脉要論第十

脉者乃氣血之先也氣血盛則脉盛氣血衰則脉衰氣血熱則脉數氣血寒則脉遲氣血微則脉弱氣血平則脉緩又長人脉長短人脉短性急則脉急性緩則脉緩反此者逆順此者從也又諸數爲熱諸遲爲寒諸緊爲痛諸浮爲風諸滑爲虛諸伏爲聚諸長爲實諸短爲虛又短澀沈遲伏皆屬陰數滑長浮緊皆

屬陽陰得陰者從陽得陽者順違之者逆陰陽消息以經而處之假令數在左手得之浮者熱入小腸得之沈者熱入於心餘皆倣此

五色

絕一作

脉論第十一

面青無右關脉者脾絕也面赤無右寸脉者肺絕也面白無左關脉者肝絕也面黃無左尺脉者腎絕也面黑無左寸脉者心絕也五絕者死夫五絕當時即死非其時則半歲死然五色雖見而五脉不見即非病者矣

脉病外内證決論第十二

病風人脉腎數浮沈有汗出不止呼吸有聲者死不然則生病氣人一身悉腫四肢不收喘無時厥逆不濕脉候沈小者死浮大者生病勞人脫肛骨肉相失聲散嘔血陽事不禁夢寐交侵呼吸不相從晝涼夜熱者死吐膿血者亦死其脉不數有根蒂者及頰不赤者生病腸辟者下膿血病人脉急皮熱食不入腹脹目瞪者死或一身厥冷脉沈細而不生者亦死食如故脉沈浮有力而不絕者生病熱人四肢厥脉弱

不欲見人食不入利下不止者死食入四肢溫脈大  
語狂無睡者生病寒人狂言不寐身冷脈數喘息目  
直者死脈有力而不喘者生陽病人精神顛倒寐而  
不惺言語失次脈候浮沈有力者生無力及食不入  
胃下利不定者死久病人脈大身瘦食不充腸言如  
不病坐臥困頓者死若飲食進退脈小而有力言語  
輕嘶額無黑氣大便結澀者生大凡陽病陰證陰病  
陽證身瘦脈大肥人脈衰上下交變陰陽顛倒冷熱  
相乘皆屬不吉從者生逆者死治療之法宜深消息

生死要論第十三

凡不病而五行絕者死不病而性變者死不病而暴  
語妄者死不病而暴不語者死不病而暴喘促者死  
不病而暴強厥一作中者死不病而暴目盲者死不病  
而暴耳聾者死不病而暴痿緩者死不病而暴腫滿  
者死不病而暴大小便結者死不病而暴無脉者死  
不病而暴昏冒如醉者死此皆內氣先盡一作絕故也  
逆者即死順者二年無有生者也

病有災惟論第十四

病有災恠何謂也病者應寒而反熱應熱而反寒應吐而不吐應瀉而不瀉應汗而不汗應語而不語應寐而不寐應水而不水皆屬災恠也此乃五臟之氣不相隨從而致之矣四逆者不治四逆者謂主客運氣俱不得時也

水法有六論第十五

病起於六腑者陽之系也陽之發也或上或下或內或外或畜在中行之極也有能歌笑者有能悲泣者有能奔走者有能呻吟者有自委曲者有自高賢者

有寤而不寐者有寐而不寤者有能食而不便利者  
有不能食而便利者有能言而聲清者有不能言  
而聲昧者狀各不同皆生六腑也喜其通者因以通  
之喜其塞者因以塞之喜其水者以水濟之喜其冰  
者以冰助之病者之樂慎勿違背亦不可強抑之也  
如此從順則十生其十百生其百疾無不愈矣

大法有五論第十六

病起於五臟者皆陰之屬也其發也或偏枯或痿躄  
或外寒而內熱或外熱而內寒或心腹膨脹或手足

拳攣或口眼不正或皮膚不仁或行步艱難或身體強硬或吐瀉不息或疼痛不寧或暴無語或久無音絲絲默默狀若死人如斯之候備出於陰陰之盛也陽必不足陽之盛也陰必不盈故前論云陽不足則助之以火精陰不足則濟之以水母者是也故喜其汗者汗之喜其溫者溫之喜其熱者熱之喜其火者火之喜其湯者湯之溫熱湯火亦在其宜慎勿強之如是則萬全其萬水火之法真陰陽也治救之道當詳明矣



風中有五生死論第十七

風中有五者謂肝心脾肺腎也五臟之中其言生死

狀各不同心風之狀

一作候

汗自出而好偃仰卧不可

轉則言語狂妄若唇正赤者生宜於心俞灸之若唇

面或青或黃或白或黑其色不定眼咽動不休者心

絕也不可救過五六日即死耳肝風之狀青色圍目

連額上但坐不得倨偻者可治若喘而目直視唇面

俱青者死肝風宜於肝俞灸之脾風狀一身通黃腹

大而滿不嗜食四肢不收持若手足未青而面黃者

可治不然即死脾風宜於脾俞灸之腎風之狀但踞  
坐而腰腳重痛也視其脇下未生黃點者可治不然  
即死矣腎風宜灸腎俞穴也肺風之狀胃中氣滿胃  
味汗出鼻不聞香臭喘而不得卧者可治若失血及  
妄語者不可治七八日死肺風宜於肺俞灸之凡診  
其脉滑而散者風也緩而大浮而緊一作虛軟而弱皆  
屬風也中風之病鼻下赤黑相兼吐沫而身直者七  
日死也又中風之病口噤筋急脉遲者生脉急而數  
者死又心脾俱中風則舌強不能言也肝腎俱中風

則手足不遂也風之厥皆由於四時不從之氣故爲  
病焉有癰癩者有偏枯者有失音者有歷節者有顛  
厥者有疼痛者有聾瞽者有瘡癩者有脹滿者有喘  
乏者有赤白者有青黑者有瘙癢者有狂妄者皆起  
於風也其脉浮虛者自虛而得之實大者自實而得  
之弦緊者汗出而得之喘乏者飲酒而得之癩厥者  
自勞而得之手足不中者言語蹇澀者房中而得之  
癰癩者自痺一作卑濕而得之歷節疼痛者因醉犯房  
而得之聾瞽瘡癩者自五味飲食冒犯禁忌而得之

千端萬狀莫離於五臟六腑而生矣所使之候配以  
此耳

積聚癥瘕雜蟲論第十八

積聚癥瘕雜蟲者皆五臟六腑真氣失而邪氣併遂  
乃生焉久之不除也或積或聚或癥或瘕或變爲蟲  
其狀各異有能害人者有不能害人者有爲病緩者  
有爲病速者有疼者有痒者有生頭足者有如杯塊  
者勢類不同蓋因內外相感真邪相犯氣血熏搏交  
合而成也積者系於臟也聚者系於腑也癥者系於

氣也瘦者系於血也蟲者乃血氣食物相感而化也  
故積有五聚有六癥有十二瘕有八蟲有九其名各  
不同也積有心肝脾肺腎也聚有大腸小腸膽胃膀  
胱三焦之六名也癥有勞氣冷熱虛實風濕食藥思  
憂之十二名也瘕有青黃燥血脂狐蛇鼈之八名也  
蟲有伏蛇白肉肺胃赤弱蟻之九名也爲病之說出  
於諸論治療之法皆具於後

勞傷論第十九

勞者勞於神氣也傷者傷於形容也饑飽無度則傷

脾思慮過度則傷心 色慾過度則傷腎 起居過常則  
腸肝喜怒悲愁過度則傷肺 又風寒暑濕則傷於外  
澁飽勞役則取於內 晝感之則病 榮夜感之則病 衛  
榮衛經行內外交運而各從其晝夜也 勞於一一起  
爲二二傳於三三通於四四干於五五復犯一一至  
於五邪乃深藏真氣自失使人肌肉消神氣弱飲食  
減行步艱難及其如此雖司命亦不能生也 故調神  
氣論曰調神氣慎酒色節起居省思慮薄滋味者長  
生之大端也 診其脉甚數一作數甚甚急甚細甚弱

餘下做此

甚微甚澀甚滑甚短甚長甚浮甚沉甚緊甚弦甚洪  
甚實皆生於勞傷

傳尸論第二十

傳尸者非一門相染而成也人之血氣衰弱臟腑虛  
羸中於鬼氣因感其邪遂成其疾也其候或咳嗽不  
已或胃膈妨悶或肢體疼痛或肌膚消瘦或飲食不  
入或吐利不定或吐膿血或嗜水漿或好歌詠或愛  
悲愁或癩風一作狂發歇或便溺艱難或因酒食而遇  
或因風雨而來或問病弔喪而得或朝走暮遊而逢

或因病聚或因血行或露臥於田野或偶會於園林  
鍾此病死之氣染而爲疾故曰傳尸也治療之方備  
於篇末

論五臟六腑虛實寒熱生死逆順之法第二十

一

夫人有五臟六腑虛實寒熱生死逆順皆見於形證  
脈氣若非診察無由識也虛則補之實則瀉之寒則  
溫之熱則涼之不虛不實以經調之此乃良醫之大  
法也其於脈證具如篇末



論肝臟虛實寒熱生死逆順脉證之法第二十

二

肝者與膽爲表裏足厥陰少陽是其經也王於春春  
乃萬物之始生其氣嫩而軟虛而寬故其脉弦軟不  
可發汗弱則不可下弦長曰平反此曰病脉虛而弦  
是謂太過病在外太過則令人善忘忽忽眩冒實而  
微是謂不及病在內不及則令人胃脘痛引兩脇脹滿  
大凡肝實則引兩脇下痛引小腹令人一本無喜怒  
虛則如人將捕之其氣逆則頭痛耳聾頰赤一作其

脉沉之而急浮之亦然主脇肋支一作滿小便難頭痛

日眩其脉急甚惡言微急氣在胃脇下緩甚嘔逆微

緩水痺大急內癰吐血微大筋痺小甚多飲微大本

作消痺一本滑甚頰疝微滑遺溺瀦甚流飲微瀦癰

攀變也一本無又肝之積氣在脇久不發爲咳逆或

爲痲瘧也虛則夢花草茸茸實則夢山林茂盛肝之

病旦喜一作晚甚夜靜肝病則頭痛脇痛一本無目

眩肢滿囊縮小便不通一作十日死又身熱惡寒四

肢不舉其脉當弦長而急反短而瀦乃金克木也十

死不治又肝中寒則兩臂痛不能舉舌本燥多太息  
胃中痛不能轉側其脉左關上遲而澀者是也肝中  
熱則喘滿而多怒目疼腹脹滿不嗜食所作不定睡  
中驚悸眼赤視不明其脉左關陰實者是也肝虛冷  
則脇下堅痛目盲臂痛發寒熱如瘧狀不欲食婦人  
則月水不來而氣急其脉左關上沉而弱者是也

論膽虛實寒熱生死逆順脉證之法第二十三  
膽者中正之腑也號曰將軍決斷出焉言能喜怒剛  
柔也與肝爲表裏足少陽是其經也虛則傷寒寒則

恐畏頭眩不能獨臥實則傷熱熱則驚悸精神不守  
臥起不寧又元水發則其根在於膽先從頭面起腫  
至足也又肝欬久不已則傳邪入於膽嘔清苦汁也  
又膽病則喜太息口苦嘔清汁一作宿汁心中澹澹恐如  
人將捕之咽中介介然數唾又膽脹則舌一作脇下痛  
口苦太息也邪氣客於膽則夢鬪訟其脉診在左手  
關上浮而得之者是其部也膽實熱則精神不守又  
膽熱則多睡膽冷則無眠又左關上脉陽微者膽虛  
也陽數者膽實也陽虛者膽絕也

論心臟虛實寒熱生死逆順脉證之法第二十

四

心者五臟之尊號帝王之稱也與小腸爲表裏神之所舍又主於血屬於火王於夏手少陰是其經也凡夏脉鉤來盛去衰故曰鉤反此者病來盛去亦盛此爲太過病在外來衰去盛此爲不及病在內太過則令人身熱而骨痛口瘡舌焦引水不及則令人煩躁

一作上爲欬唾下爲氣洩其脉來累累如連珠如循

琅玕曰平脉來累累

一本無此四字卻作喘喘

連屬其中微曲

病來前曲後倨如操帶鉤曰死又思慮過多則怵惕  
怵惕傷心心傷則神失神失則恐懼又真心痛手足  
寒過節五寸則旦得夕死夕得旦死又心有水氣則  
痺氣滯身腫不得臥煩而躁其陰腫也又心中風則  
翁翁一作發熱不能行立心中饑而不能食食則吐  
嘔夏心旺左手寸口脉洪浮大而散曰平反此則病  
若沉而滑者水來克火十死不治弦而長者木來歸  
子其病自愈緩而大者土來入火爲微邪相干無所  
害又心病則胃中痛四脇一作脇肢滿脹肩背臂膊皆痛

虛則多驚悸惕惕然無眠胃腹及腰背引痛喜一作善

悲時眩仆心積氣久不去則苦憂煩心中痛實則喜

笑不息夢火發心氣盛則夢喜笑及恐畏邪氣客於

心則夢山邱煙火心脹則心煩短氣夜臥不寧心腹

痛懊懷腫氣來往上下行痛有時休作心腹中熱喜

水涎出是蛟蛟心也心病則口中慧夜半甚平旦靜

又左手寸口脉大甚則手內熱赤一作腫太甚則胃

中滿而煩澹澹面赤日黃也又心病則先心痛而咳

不止關膈一作格不通身重不已三日死心虛則畏人

瞑目欲眠精神不倚魂魄妄亂心脉沉小而緊浮主

氣喘若心下氣堅實不下喜咽乾手熱煩滿多忘太

息此得之思憂太過也其脉急甚則發狂笑微緩則

吐血大甚則喉閉痺一作痺微大則心痛引背善淚出小

甚則嘔微小則笑消瘵痺一作痺滑甚則爲渴微滑則心

疝引臍腹腸一作腸鳴澀甚則瘖不能言微澹則血溢手

足厥耳鳴癩疾又心脉搏堅而長主舌強不能語一作

言軟而散當懾怯不食也又急甚則心疝臍下有病

形煩悶少氣大熱上煎又心病狂言汗出如珠身厥



冷其脉當浮而大反沉濡而滑甚色當赤今反黑者

水剋火十死不治又心之積沉之而空空然時上下

往來無常處病胃滿脰腰腹中熱頰一作面赤咽乾心

煩掌中熱甚則嘔血夏差一本作春差冬甚宜急療之止

於旬日也又赤黑色入口必死也面黃目赤者亦一作

不死赤如衄血亦死又憂恚思慮太過心氣內索其

色反和而盛者不出十日死扁鵲曰心絕則一日死

色見凶多而人雖健敏名爲行尸一歲之中禍必至

矣又其人語聲前寬而後急後聲不接前聲其聲濁

惡其口不正冒昧喜笑此風入心也又心傷則心壞  
爲水所乘身體手足不遂骨節解舒緩不自由下利  
無休息此疾急宜治之不過十日而亡也又笑不待  
呻而復憂此水乘火也陰繫於陽陰起陽伏伏則生  
熱熱則生狂冒昧妄亂言語錯誤不可採問一作心  
已損矣扁鵲曰其人唇口赤即可治青黑即死又心  
瘧則先煩一作顛而後渴翕翕發熱也其脉浮緊而大  
者是也心氣實則小便不利腹滿身熱而重溫溫欲  
吐吐而不出喘息急不安臥其脉左寸口與人迎皆

實大者是也心虛則恐懼多驚憂思不樂胃腹中苦  
痛言語戰慄惡寒恍惚面赤目黃喜衄血診其脉左  
右寸口兩虛而微者是也

論小腸虛實寒熱生死逆順脉證之法第二十

五

小腸者受盛之腑也與心爲表裏手太陽是其經也

心與一作無此二字小腸絕者六日死絕則髮直如麻汗出

不已不得屈伸者是也又心咳一本作病久不已此二字

則傳小腸小腸欬則氣欬俱出也小腸實則傷熱熱

則口生瘡虛則生寒寒則泄濃血或泄黑水其根在小腸也又小腸寒則下腫重有熱久不出則漸生痔疾有積則當暮發熱明旦而止也病氣發則令人腰下重食則窘迫而便難是其候也小腸脹則小腹脹脹引腹而痛也厥邪入小腸則夢聚并邑中或咽痛頷腫不可回首肩如杖一作拔腳如折也又黃帝曰心者主也神之舍也其臟周密而不傷傷神去神去則身亡矣故人心多不病病即死不可治也惟小腸受病多矣又左手寸口陽絕者無小腸脉也六日死病

臍痺小腹中有疝瘕也左手寸口脉實大者小腸實  
也有熱邪則小便赤澀又實熱則口生瘡身熱去來  
心中煩滿體重又小腸主於舌之官也和則能言而  
機關利健善別其味也虛則左寸口脉浮而微軟弱  
不禁按病爲驚狂無所守下空空然不能語者是也

論脾臟虛實寒熱生死逆順脉證之法第二十

六

脾者土也諫議之官主意與智消磨五穀寄在其中  
養於四旁王於四季正王長夏與胃爲表裏足太陰

是其經也扁鵲曰脾病則面色萎黃實則舌強直不嗜食嘔逆四肢緩虛則精不勝元氣乏失溺不能自持其脉來似水之流曰太過病在外其脉來如鳥之距曰不及病在內太過則令人四肢沉重語言蹇澀不及令人中滿不食乏力手足緩弱不遂涎引口中

一作

四肢腫脹溏瀉

一作泄

不時夢中飲食脾脉來而

和柔去似雞距踐地曰平脉來實而滿稍數如雞舉

足曰病又如鳥

一作雀

之啄如鳥之距如屋之漏曰死

中風則翕翕發熱狀若醉人腹中煩滿皮肉瞤瞤短

氣者是也王時其脉阿阿然緩曰平反弦急者肝來  
尅脾真鬼相遇大凶之兆反微瀼而短者肺來乘脾  
不治而自愈反沉而滑者腎來從脾亦爲不妨反浮  
而洪心來生脾不爲疾耳脾病而黃體重失便日直  
視唇反張手足爪甲青四肢逆吐食百節疼痛不能  
舉其脉當浮大而緩今反弦急其色當黃而反青此  
十死不治也又脾病其色黃飲食不消心腹脹滿身  
體重肢節痛大便硬小便不利其脉微緩而長者可  
治脾氣虛則大便滑小便利汗出不止五液注下爲

五色注利下也又積口口久不愈則四肢不收黃疸  
飲食不爲肌膚氣滿脹而喘不定也又脾實則時夢  
築垣墻蓋屋脾盛則夢歌樂虛則夢飲食不足厥邪  
客於脾則夢大澤邱陵風雨壞屋脾脹則善噦四肢  
急體重不食善噫脾病則日昃慧平旦甚日中持下  
晡靜脈急甚則痰癥微急則胃膈中不利食入而還  
出脈緩盛則痿厥微緩則風痿四肢不收大甚則擊  
仆微大則痺疝氣裏大膿血在胃腸之外小甚則寒  
熱作微小則消痺滑甚則頽疝微滑則蟲毒腸鳴中



熱溇甚則腸癰微溇則內潰下膿血脾脉之至也大  
而虛則有積氣在腹中有厥氣名曰厥疝女子同法

得之四肢汗出當風也脾絕則十日死又臍出

一作凸

者亦死唇焦枯無紋理而青黑者脾先絕也脾病面  
黃目赤者可治青黑色入口則半歲死色如枳實者

一

一作半

月死吉凶休否

一作皆

皆見其色出於部分也

又口噤唇黑四肢重如山不能自收持大小便利無  
休歇飲食不入七日死又唇雖痿黃語聲轉轉者可  
治脾病瘧氣久不去腹中痛鳴徐徐熱汗出其人本

意寬緩今忽反常而嗔怒正言而鼻笑不能答人者此不過一月禍必至矣又脾中寒熱則皆使人腹中痛不下食又脾病則舌強語澀轉筋卵縮牽陰股引髀痛身重不思食鼓脹變則水泄不能臥者死不治也脾正熱則面黃目赤季脇痛滿也寒則吐涎沫而不食四肢痛滑泄不已手足厥甚則顛慄如瘧也臨病之時要在明證詳脉然後投湯丸求其痊損耳

論胃虛實寒熱生死逆順脉證之法第二十七  
胃者腑也又名水穀之海與脾爲表裏胃者人之根

本也胃氣壯則五臟六腑皆壯足陽明是其經也胃氣絕則五日死實則中脹便難肢節疼痛不下食嘔吐不已虛則腸鳴脹滿引水滑泄寒則腹中痛不能食冷物熱則面赤如醉人四肢不收持不得安臥語狂目亂便硬者是也病甚則腹脇脹滿吐逆不入食當心痛上下不通惡聞食臭嫌人語振寒喜伸欠胃中熱則唇黑熱甚則登高而歌棄衣而走顛狂不定汗出額上熱衄不止虛極則四肢腫滿胃中短氣穀不化中消也胃中風則溏泄不已胃不足則多饑不

消食病人鼻下平則胃中病渴者不可治

一本無上  
十三字作

微燥而渴  
者可治

胃脉搏堅而長其色黃赤者當病折腰一作

解其脉軟而散者病食痺左關上脉浮而大者虛也  
浮而短濇者實也浮而微滑者亦虛也浮而遲者寒  
也浮而數者實也虛實寒熱生死之法察而端謹則  
成神妙也

論肺臟虛實寒熱生死逆順脉證之法第二十

八

肺者魄之舍生氣之源號爲上將軍乃五臟之華蓋

也外養皮毛內榮腸胃與大腸爲表裏手太陰是其

經也肺氣通於鼻和則能知香臭矣有寒則善欬一本

作有病則喜欬實則鼻流清涕凡虛實寒熱則皆使人喘嗽

實則夢刀兵恐懼肩息胷中滿虛則寒生一作熱欬一作

喘息利下少氣力多悲感王於秋其脉浮而毛曰平

又浮而短濇者肺脉也其脉來毛而中央堅兩頭一作

傍虛曰太過病在外其脉來毛而微曰不及病在內

太過則令人氣逆胷滿背痛不及則令人喘呼而欬

一作嗽上氣見血下聞病音又肺脉厭厭聶聶如落榆

英曰平來不上不下如循雞羽曰病來如物之浮如  
風吹鳥背上毛者死真肺脉至大而虛又如以毛羽  
中人皮膚其色赤其毛折者死又微毛曰平毛多曰  
病毛而弦者曰春病眩甚曰即病又肺病吐血皮  
熱脉數頰赤者死也又久欬而見血身熱而短氣脉  
當濇今反浮大色當白今反赤者火剋金十死不治  
也肺病喘咳身但寒無熱脉遲微者可治秋王於肺  
其脉當浮濇而短曰平而反洪大而長是火刑金亦  
不可治又得軟而滑者腎來乘肺不治自愈反浮大

而緩者是脾來生肺不治而差反弦而長者是肺被  
肝從爲微邪雖病不妨虛則不能息耳重噤乾喘咳  
上氣胃背痛有積則脇下脹滿中風則口燥而喘身  
運而重汗出而冒悶其脉按之虛弱如葱葉下無根  
者死中熱則唾血其脉細緊浮數芤滑皆失血病此  
由燥擾嗔怒勞傷得之氣壅結所爲也肺脹則其人  
喘咳而目如脫其脉浮大者是也又肺痿則吐涎沫  
而咽乾欲飲者爲愈不飲則未差又咳而遺溺者上  
虛不能制下也其脉沉濁者病在內浮清者病在外

肺死則鼻孔開而黑枯喘而目直視也又肺絕則十  
二日死其狀足滿瀉痢不覺出也面白目青此謂亂  
經此雖天命亦不可治又飲酒當風中於肺則咳嗽  
喘悶見血者不可治無血者可治面黃目白者可治  
肺病頰赤者死又言音喘急短氣好唾一作睡此爲真  
鬼相害十死十百死百大逆之兆也又陽氣上而不  
降燔於肺肺自結邪脹滿喘急狂言瞑目非常所說  
而口鼻張大小便頭俱脹飲水無度此因熱傷於肺  
肺化爲血不可治則半歲死又肺瘧使人心寒寒甚



則發熱寒熱往來休作不定多驚咳喘如有所見者  
是也其脉浮而緊又滑而數又遲澹而小皆爲肺瘧  
之脉也又其人素聲清而雄者暴不響亮而拖氣用  
力言語難出現不轉睛雖未爲病其人不久又肺病  
實則上氣喘急咳嗽身熱脉大也虛則力乏喘促右  
脇脹語言氣短一作促者是也又乍寒乍熱鼻寒頤赤  
面白皆肺病之候也

論大腸虛實寒熱生死逆順脉證之法第二十

九

大腸者肺之腑也爲傳送之司號監倉之官肺病久  
不已則傳入大腸手陽明是其經也寒則泄熱則結  
絕則泄利無度利絕而死也熱極則便血又風中大  
腸則下血又實熱則脹滿而大便不通虛寒則滑泄  
不定大腸乍虛乍實乍來乍去寒則溏泄熱則垢重  
有積物則寒慄而發熱有如瘧狀也積冷不去則當  
臍而痛不能久立痛已則泄白物是也虛則喜滿喘  
咳而喉咽中如核妨矣

華氏中藏經卷上終

華氏中藏經卷中

漢 譙 郡 華 陀 元 化 撰

論腎藏虛實寒熱生死逆順脉證之法第三十

腎者精神之舍性命之根外通於耳男以閉一作庫精

女以包血與膀胱爲表裏足少陰太陽是其經也腎

氣絕則不盡其天命而死也王於冬其脉沉濡曰平

反此者病其脉彈石名曰太過病在外其去如數者

爲不及病在內太過則令人解侷脊脉痛而少氣一本

作令人體瘠而不及則令人心懸如饑眇中清脊中

少氣不欲言

痛少腸腹滿小便滑

一本云心如懸少腹痛小便滑

變赤黃色也又

腎脉來喘喘累累如鈎按之而堅曰平又來如引葛按之益堅曰病來如轉索辟辟如彈石曰死又腎脉但石無胃氣亦死腎有水則腹大臍腫腰重痛不得溺陰下濕如牛鼻頭汗出是爲逆寒大便難其面反瘦也腎病手足逆冷面赤目黃小便不禁骨節煩痛小腹結痛氣上衝心脉當沉細而滑今反浮大而緩其色當黑其今反者是土來克水爲大逆十死不治也又腎病面色黑其氣虛弱翁翁少氣兩耳若聾精

自出飲食少小便清膝下冷其脉沉滑而遲爲可治  
又冬脉沉濡而滑曰平反浮濇而短肺來乘腎雖病  
易治反弦細而長者肝來乘腎不治自愈反浮大而  
洪心來乘腎不爲害腎病腹大脛腫喘欬身重寢汗  
出憎風虛則胃中痛大腹小腹痛清厥意不樂也陰  
邪入腎則骨痛腰上引項瘖背疼此皆舉重用力及  
遇房汗出當風浴水或久立則傷腎也又其脉急甚  
則腎痿痠疾微急則沉厥奔豚足不收緩甚則折脊  
微緩則洞泄食不化入咽還出大甚則陰痿微大則

石水起臍下至小腹其腫垂垂然而上至胃腕者死  
不治小甚則洞泄微小則消痺滑甚則癰癩微滑則  
骨痿坐弗能起目視見花濇甚則大壅塞微濇則不  
月疾痔又其脉之至也上堅而大有膿氣在陰中及  
腹內名曰腎痺得之因浴冷水而臥脉來沉而大堅  
浮而繁若手足骨腫厥陰痿不起腰背疼小腹腫心  
下水氣時脹滿而洞泄此皆浴水中身未乾而合房  
得之也虛則夢舟溺人得其時夢伏水中若有所畏  
盛實則夢腰脊離解不相屬厥邪客於腎則夢臨深

投水中腎脹則腹痛滿引背怏怏然腰痺痛腎病夜  
半患四季甚下晡靜腎生病則口熱舌乾咽腫上氣  
嗑乾及心煩而痛黃疸腸澼痿厥腰脊背急痛嗜臥  
足下熱而痛胛酸病久不已則腿筋痛小便閉而兩  
脇脹支滿目盲者死腎之積苦腰脊相引而疼饑見  
飽減此腎中寒結在臍下也諸積大法其脉來細軟  
而附骨者是也又面黑目白腎已內傷八日死又陰  
縮小便不出出而不快者亦死又其色青黃連耳左  
右其人年三十許百日死若偏在一邊一月死實則

煩悶臍下重熱則口舌乾焦而小便澀黃寒則陰中與腰脊俱疼面黑耳乾噦而不食或嘔血者是也又喉中鳴坐而喘咳唾血出亦爲腎虛寒氣欲絕也寒熱虛實旣明詳細調救即十可十全之道也

論膀胱虛實寒熱生死逆順脉證之法第三十

一

膀胱者津液之腑與腎爲表裏號曰水曹掾又名玉海足太陽是其經也總通於五腑所以五腑有疾即應膀胱膀胱有疾即應胞囊也傷熱則小便不利熱



入膀胱則其氣急而苦小便黃澀也膀胱寒則小便數而清也又石水發則其根在膀胱四肢瘦小其腹脹大者是也又膀胱欬久不已則傳入三焦腸滿而不欲飲食也然上焦主心肺之病人有熱則食不入胃寒則精神不守泄利不止語聲不出也實則上絕於心氣不行也虛則引起氣之於肺也其三焦之氣和則五臟六腑皆和逆則皆逆膀胱中有厥陰氣則夢行不快滿脹則小便不下臍下重悶或肩痛也絕則三日死死時雞鳴也其三焦之論備云於後

論三焦虛實寒熱生死逆順脈證之法第三十

二

三焦者人之三元之氣也號曰中清之腑總領五臟六腑榮衛經絡內外左右上下之氣也三焦通則內外左右上下皆通也其於周身灌體和內調外榮左養右導上宣下奠大於此者也又名王海水道上則曰三管中則名霍亂下則曰走哺名雖三而歸一有其名而無形者也亦號曰孤獨之腑而衛出於上榮出於中上者絡脈之系也中者經脈之系也下者水

道之系也亦又屬膀胱之宗始主通陰陽調虛實呼吸有病則苦腹脹氣滿小腹堅溺而不得便而窘迫也溢則作水留則爲脹足太陽是其經也又上焦實熱則額汗出而身無汗能食而氣不利舌乾口焦咽閉之類腹脹時時脇肋痛也寒則不入食吐酸水胃背引痛嗌乾津不納也實則食已還出膨膨然不樂虛則不能制下遺便溺而頭面腫也中焦實熱則上下不通腹脹而喘咳下氣不止上氣不下關格而不通也寒則下痢不止食飲不消而中滿也虛則腸鳴

鼓脹也下焦實熱則小便不通而大便難苦重痛也  
虛寒則大小便泄下而不止三焦之氣和則內外和  
逆則內外逆故云三焦者人之三元之氣也宜修養  
矣

論痺第三十三

痺者風寒暑濕之氣中於人臟腑之爲也入腑則病  
淺易治入臟則病深難治而有風痺有寒痺有濕痺  
有熱痺有氣痺而又有筋骨血肉氣之五痺也大凡  
風寒暑濕之邪入於肝則名筋痺入於腎則名骨痺

入於心則名血痺入於脾則名肉痺入於肺則名氣  
痺感病則同其治乃異痺者閉也五臟六腑感於邪  
氣亂於真氣閉而不仁故曰痺病或痛或癢或淋或  
急或緩而不能收持或拳而不能舒張或行立艱難  
或言語蹇澀或半身不遂或四肢拳縮或口眼偏邪  
或手足欹側或能行步而不能言語或能言語或不  
能行步或左偏枯或右壅滯或上不通於下或下不  
通於上或大腑閉塞一作小或左右手疼痛或得疾  
而即死或感邪而未亡或喘滿而不寐或昏冒而不

醒種種諸症皆出於痺也痺者風寒暑濕之氣中於人則使之然也其於脉候形證治療之法亦各不同焉

論氣痺第三十四

氣痺者愁憂思喜怒過多則氣結於上久而不消則傷肺肺傷則生氣漸衰則邪氣愈勝留於上則胃腹痺而不能食注於下則腰腳重而不能行攻於左則左不遂衝於右則右不仁貫於舌則不能言遺於腸中則不能溺壅而不散則痛流而不聚則麻真經既

損難以醫治邪氣不勝易爲痊愈其脉右手寸口沉而遲澀者是也宜節憂思以養氣慎一作絕喜怒以全真此最爲良法也

論血痺第三十五

血痺者飲酒過多懷熱太甚或寒折於經絡或濕犯於榮衛因而血搏遂成其咎故使人血不能榮於外氣不能養於內內外已失漸漸消削左先枯則右不能舉右先枯則左不能伸上先枯則上不能制於下下先枯則下不能尅於上中先枯則不能通疎百證

千狀皆失血也其脉左手寸口脉結而不流利或如  
斷絕者是也

論肉痺第三十六

肉痺者飲食不節膏粱肥美之所爲也脾者肉之本  
脾氣已失則肉不榮肉不榮則肌膚不滑澤肌肉不  
滑澤則腠理疎則風寒暑濕之邪易爲入故久不治  
則爲肉痺也肉痺之狀其先能食而不能充悅四肢  
緩而不收持者是也其右關脉舉按皆無力而往來  
澀者是也宜節飲食以調其臟常起居以安其脾然



後依經補瀉以求其愈爾

論筋痺第三十七

筋痺者由怒叫無時行步奔急淫邪傷肝肝失其氣因而寒熱所客久而不去流入筋會則使人筋急而不能行步舒緩也故曰筋痺宜活血以補肝溫氣以養腎然後服餌湯丸治得其宜即疾瘳已不然則害人矣其脉左關中弦急而數浮沉有力者是也

論骨痺第三十八

骨痺者乃嗜慾不節傷於腎也腎氣內消則不能關

禁不能關禁則中上俱亂中上俱亂則三焦之氣痞而不通三焦痞而飲食不糟粕飲食不糟粕則精氣日衰精氣日衰則邪氣妄入邪氣妄入則上衝心舌上衝心舌則爲不語中犯脾胃則爲不充下流腰膝則爲不遂傍攻四肢則爲不仁寒在中則脉遲熱在中則脉數風在中則脉浮濕在中則脉濡虛在中則脉滑其證不一要在詳明治療法列於後章

論治中風偏枯之法第三十九

人病中風偏枯其脉數而面乾黑黧手足不遂語言

寒濕治之奈何在上則吐之中則瀉之在下則補  
之在外則發之在內則溫之按之熨之也吐謂出其  
涎也瀉謂通其塞也補謂益其不足也發謂發其汗  
也溫謂驅其濕也按謂散其氣也熨謂助其陽也治  
之各合其宜安可一揆在求其本脉浮則發之脉滑  
則吐之脉伏而澀則瀉之脉緊則溫之脉遲則熨之  
脉閉則按之要察其可否故不可一揆而治者也

論五丁狀候第四十

五丁者皆由喜怒憂思衝寒冒熱恣飲醇酒多嗜甘

肥毒魚酢醬色慾過度之所爲也畜其毒邪浸漬臟腑久不攄散始變爲丁其名有五一曰白丁二曰赤丁三曰黃丁四曰黑丁五曰青丁白丁者起於右鼻下初起如粟米根赤頭白或頑麻或痛癢使人憎寒頭重狀若傷寒不欲食胃膈滿悶喘促昏冒者死未者可治此疾不過五日禍必至矣宜急治之赤丁在舌下根頭俱赤發痛舌本硬不能言多驚煩悶恍惚多渴引一作飲水不休小便不通發狂者死未者可治此疾不過七日禍必至也不可治矣大人小兒皆能

患也黃丁者起於唇齒齦邊其色黃中有黃水發則

令人多

能一作

食而還

復一作

出手足麻木涎出不止腹

脹而煩多睡不寐者死未者可治黑丁者起於耳前  
狀如癥瘕其色黑長減不定使人牙關急腰脊腳膝  
不仁不然即痛亦不出三歲禍必至矣不可治也此  
由腎氣漸絕故也宜慎慾事青丁者起於目下始如  
瘤癥其色青硬如石使人目昏昏然無所見多恐悸  
惕睡不安寧久不已則令人目盲或脫精有此則不  
出一年禍必至矣白丁者其根在肺赤丁者其根在

心黃丁者其根在脾黑丁者其根在腎青丁者其根  
在肝五丁之候一作疾最爲巨疾一作病不可不察也治  
療之法一一如左

論癰疽瘡腫第四十一

夫癰疽瘡腫之所作也皆五臟六腑畜毒不流則生  
本作皆有矣非獨因榮衛壅塞而發者也其行也有處其

主也有歸假令發於喉舌者心之毒也發於皮毛者  
發於肌肉者脾之毒也發於骨髓者腎之毒也

關肝毒

發於下者陰中之毒也發於上者陽中之毒也發於

外者六腑之毒也發於內者五臟之毒也故內曰壞  
外曰潰上曰從下曰逆發於上者得之速發於下者  
得之緩感於六腑則易治感於五臟則難瘳也又近  
骨者多冷近虛者多熱近骨者久不愈則化血成蠱  
近虛者久不愈則傳氣成漏成蠱則多癢而少痛或  
先癢後痛成漏則多痛而少癢或不痛或不癢內虛  
外實者多痒而少痛外虛內實者多痛而少痒血不  
止者則多死膿疾潰者則多生或吐逆無度飲食不  
時皆癰疽之使然也種候萬一一作多端要憑詳治療

之法列在後篇

論腳弱狀候不同第四十二

人之病腳氣與氣腳之爲異何也謂人之喜怒憂思  
寒熱邪毒之氣自內而注入於腳則名氣腳也風寒  
暑濕邪毒之氣從外而入於腳膝漸傳於內則名腳  
氣也然內外皆以邪奪正故使人病形頗相類例其  
於治療亦有上下先後也故分別其目若一揆而不  
察其由則無理致其瘳也夫喜怒憂思寒熱邪毒之  
氣流入肢節或注於腳膝其狀類諸風歷節偏枯癱



腫之證但入於腳膝則謂之氣腳也若從外而入於足從足而入臟者乃謂之腳氣也氣腳者先治內而次治外腳氣者先治外而次治內實者利之虛者益之又人之病腳氣多者何也謂人之心肺二經起於手脾腎肝三經起於足手則清邪中之足則濁邪中之人身之苦者手足耳而足則最重艱苦故風寒暑濕之氣多中於足以此腳氣之病多也然而得之病者從漸而生疾但始萌而不悟悟亦不曉醫家不爲腳氣將爲別疾治療不明因循至大身居危地本從

微起浸成巨候流入臟腑傷於四肢頭項腹背也而疾未甚終不能知覺也特因他而作或如傷寒或如中暑或腹背疼痛或肢節不仁或語言錯亂或精神昏昧或時喘乏或暴盲聾或飲食不入或臟腑不通或攀急不遂或舒緩不收或口眼牽搐或手足顛掉種種多狀莫有達者故使愚俗束手受病死無告陳仁者見之豈不傷哉今述始末略示後學請深消息至如醉入房中飽眠露下當風取涼對月貪歡沐浴未乾而熟睡房室纔罷而衝軒久立於低濕久佇於

水涯冒雨而行瀆寒而寢勞傷汗出食飲悲生犯諸  
禁忌因成疾矣其於不正之氣中於上則害於頭目  
害於中則盡於心腹形於下則災於腰腳及於旁則  
妨於肢節千狀萬證皆屬於氣腳但起於腳膝乃謂  
腳氣也形候脉證亦在詳明其脉浮而弦者起於風  
濡而弱者起於濕洪而數者起於熱遲而溢者起於  
寒滑而微者起於虛牢而堅者起於實在於上則由  
於上在於下則由於下在於中則生於中結而因氣  
散則因憂緊則因怒細則因悲風者汗之而愈濕者

溫之而愈熱者解之而愈寒者熨之而愈虛者補之  
實者瀉之氣者流之憂者寬之怒者悅之悲者和之  
能通此者乃謂之良醫又腳氣之病傳於心腎則十  
死不治入心則恍惚忘謬嘔吐食不入眠不安寧口  
眼不定左手寸口手脈乍大乍小乍有乍無者是也  
入腎則腰腳俱腫小便不通呻吟不絕目額皆見黑  
色氣時上衝胃腹而喘其左手尺中脈絕者是也切  
宜詳審矣

論水腫脈證生死候第四十三

人中百病難療者莫過於水也水者腎之制也腎者人之本也腎氣壯則水還於海腎氣虛則水散於皮又三焦壅塞榮衛閉格血氣不從虛實交變水隨氣流故爲水病有腫於頭目者有腫於腰腳者有腫於四肢者有腫於雙目者有因嗽而發者有因勞而生者有因凝滯而起者有因虛乏而成者有因五臟而出者有因六腑而來者類目多種而狀各不同所以難治者由此百狀人難曉達縱曉其端則又苦人以矯恣不循理法觸冒禁忌弗能備矣故人中水疾死

者多矣水有十名具於篇末一曰青水二曰赤水三  
曰黃水四曰白水五曰黑水六曰元水七曰風水八  
曰石水九曰裏水十曰氣水青水者其根起於肝其  
狀先從面腫而漸行一身也赤水者其根起於心其  
狀先從胃腫起也黃水者其根起於脾其狀先從腹  
腫也白水者其根起於肺其狀先從腳腫而上氣喘  
嗽也黑水者其根起於腎其狀先從足趺腫元水者  
其根起於膽其狀先從頭面起腫而至足者是也風  
水者其根起於胃其狀先從四肢起腹滿大而通身

腫也石水者其根在膀胱其狀起臍下而腹獨大是

也裏水者其根在小腸其狀先從小腹脹而不腫漸

漸而腫也

一作小腹脹而暴腫也

氣水者其根在大腸其狀乍

來乍去乍盛乍衰者是也此良由上下不通關竅不

利氣血痞格陰陽不調而致之也其脉洪大者可治

微細者不可治也又消渴之疾久不愈令人患水氣

其水臨時發散歸於五臟六腑則生爲病也消渴者

因冒風衝熱饑飽失節飲酒過量嗜慾傷頻或餌金

石久而積成使之然也

論諸淋及小便不利第四十四

諸淋與小便不利者皆由五臟不通六腑不和三焦痞澀榮衛耗失冒熱飲酒過醉入房竭散精神勞傷氣血或因女色興而敗精不出或因迷寵不已而真髓多輸或驚惶不次或思慮未寧或饑飽過時或奔馳不定或隱忍大小便或發泄久興或寒入膀胱或暑中胞囊傷茲不慎致起斯疾狀候變異名亦不同則有冷熱氣勞膏砂虛實之八種耳冷淋者小便數色白如泔也熱淋者小便澀而色赤如血也氣淋者



臍腹滿悶小便不流利而痛也勞淋者小便淋瀝不絕如水之滴漏而不斷絕也膏淋者小便中出物如脂膏也砂淋者臍腹中隱痛小便難其痛不可忍須臾從小便中下如砂石之類有大者如阜子或赤或白一作黃色澤不定此由腎氣弱而貪於女色房而不泄泄而不止虛傷真氣邪熱漸強結聚而成砂又如以水煮鹽火大水少鹽漸成石之類謂腎者水也鹹歸於腎水消於下虛熱日甚煎結而成此非一時而作也蓋遠久乃發成即五歲敗即三年壯人五載禍

必至矣宜乎急攻八淋之中唯此最危其脉甚大而實者可治虛小而澁者不可治虛者謂腎與膀胱俱虛而精滑夢泄小便不禁者也實則謂經絡閉澁水道不利而莖痛腿酸者也又諸淋之病與淋相從者活反者死凶治療之際亦在詳酌耳

論服餌得失第四十五

石之與金有服餌得失者蓋以其宜與不宜也或草或木或金或石或單方得力或羣隊獲功或金石毒發而致斃或草木勢助而能全其驗不一者何也基

本實者得宣通之性必延其壽基本虛者得補益之情必長其年虛而過瀉實乃更增千死其千萬歿其萬則決然也又有年少之輩富貴之人恃其藥力恣其酒慾誇弄其術暗使精神內損藥力扶持忽然疾作何能救療如是之者豈知災從內發但恐藥餌無徵功實可歎哉其於久服方藥在審其宜人藥相合效豈妄邪假如臟不足則補其臟腑有餘則瀉其腑外實則理外內虛則養內上塞則引上下塞則通下中瀉

結一作

則解中左病則治左右病則治右上下左

右內外虛實各稱其法安有橫夭者也故藥無不効  
病無不愈者切務於謹察矣

辨三痞論并方第四十六

金石草木單服皆可以不死者有驗無驗在乎有志  
無志也雖能久服而有其藥熱壅塞而不散或上或  
下或痞或澀各有其候請速詳明用其此法免敗其  
志皆於壽矣謹論候并方具在後篇

辨上痞候并方

上痞者頭眩目昏面赤心悸肢節痛前後不仁多痰

短氣懼火喜寒又狀若中風之類者是也宜用後方

桑白皮

闊一寸長一尺

檳榔一枚

木通

一尺一本去皮

大黃

三分濕紙煨

黃芩

一分

澤瀉

二兩

右剉爲麤末水五升熬取三升取清汁分二作一本三服食後臨臥服

辨中痞并方

中痞者腸滿四肢倦行立艱難食已嘔吐冒昧減食或渴者是也宜用後方

大黃

一兩濕紙十重包裹煨令香熱切片子

檳榔一枚

木香 一分

右爲末生蜜爲圓如桐子大每服三十丸生姜湯  
下食後日午日進二服未減加之効即勿再服附  
方

桂

五錢不  
見火

檳榔 一箇

黑牽牛

四兩生爲  
末二兩

右爲末蜜酒調二錢以利爲度

辨下痞候并方

下痞者小便利不利臍下滿硬語言蹇滯腰背疼痛腳  
重不能行立者是也宜用後方

瞿麥頭子兩

官桂一分

甘遂三分

車前子

炒一兩

右件爲末以犢猪腎一箇去筋膜薄批開入藥末  
二錢勻糝濕紙裹慢火煨熟空心細嚼溫酒送下  
以大利爲度小便未利臍腹未軟更服附方

葱白一寸去心入碓砂末一錢安葱心中兩頭  
以線子繫之濕紙包煨熟用冷醇酒送下空心  
服以効爲度

論諸病治療交錯致於死候第四十七

夫病者有宜湯者有宜圓者有宜散者有宜下者有  
宜吐者有宜汗者有宜灸者有宜鍼者有宜補者有  
宜按摩者有宜導引者有宜蒸熨者有宜溲洗者有  
宜悅愉者有宜和緩者有宜水者有宜火者種種之  
法豈能一也若非良善精博難爲取愈其庸下識淺  
亂投湯圓下汗補吐動使交錯輕者令重重者令死  
舉世皆然且湯可以蕩滌臟腑開通經絡調品陰陽  
祛分邪惡潤澤枯朽悅養皮膚益充氣力扶助困竭  
莫離於湯也圓可以逐風冷破堅癥消積聚進飲食



舒榮衛開關竅緩緩然泰合無出於圓也散者能祛  
風寒暑濕之氣摠寒濕穢毒之邪發揚四肢之壅滯  
除剪五藏之結伏開腸和胃行脉通經莫過於散也  
下則疎豁閉塞補則益助虛乏灸則起陰通陽鍼則  
行榮引衛導引則可以逐客邪於關節按摩則可以  
驅浮淫於肌肉蒸熨辟冷煖洗生陽悅愉爽神和緩  
安氣若實而不下則使人心腹脹滿煩亂鼓腫若虛  
而不補則使人氣血消散精神耗亡肌肉脫失志意  
昏迷可汗而不汗則使人毛孔關塞悶絕而終合吐

而不吐則使人結胃上喘水食不入而死當灸而不  
灸則使人冷氣重凝陰毒內聚厥氣上衝分遂不散  
以致消滅當鍼而不鍼則使人榮衛不行經絡不利  
邪漸勝真冒昧而昏宜導引而不導引則使人邪侵  
關節固結難通宜按摩而不按摩則使人淫隨肌肉  
久留不消宜蒸熨而不蒸熨則使人冷氣潛伏漸成  
痺厥宜澡洗而不澡洗則使人陽氣上行陰邪相害  
不當下而下則使人開腸蕩胃洞泄不禁不當汗而  
汗則使人肌肉消絕津液枯耗不當吐而吐則使人

心神煩亂臟腑奔衝不當灸而灸則使人重傷經絡  
內蓄炎毒反害中和致於不可救不當鍼而鍼則使  
人氣血散失關機細縮不當導引而導引則使人真  
氣勞敗邪氣妄行不當按摩而按摩則使人肌肉膜  
脹筋骨舒張不當蒸熨而蒸熨則使人陽氣徧行陰  
氣內聚不當淋漆而淋漆則使人濕侵皮膚熱生肌  
體不當悅愉而悅愉則使人神失氣消精神不快不  
當和緩而和緩則使人氣停意折健忘傷志大凡治  
療要合其宜脉狀病候少陳於後凡脉不緊數則勿

發其汗脉不疾數不可以下心胃不閉尺脉微弱不  
可以吐關節不急榮衛不壅不可以鍼陰氣不盛陽  
氣不衰勿灸內無客邪勿導引外無淫氣勿按摩皮  
膚不痺勿蒸熨肌內不寒勿煖洗神不凝迷勿悅愉  
氣不急奔勿和緩順此者生逆此者死耳脉病之法  
備說在前

論診雜病必死候第四十八

夫人生氣健壯者外色光華內脉平調五臟六腑之  
氣消耗則脉無所依色無所澤如是者百無一生雖

能飲食行立而端然不悟不知死之逼矣實爲病口  
其大法列之於後

病瞪目引水心下牢滿其脉濡而微者

論吐衄瀉血其脉浮大牢數者

病妄言身熱手足冷其脉細微者

病大洩不止其脉緊大而滑者

病頭目痛其脉濇短者

病腹中痛其脉浮大而長者

病腹痛而喘其脉滑而利數而緊者

病四逆者其脉浮大而短者

病耳無聞其脉浮大而濇者

病腦痛其脉緩而大者

左痛右痛上痛下痛者

下痛而脉病者

病厥逆呼之不應脉絕者

病人脉宜大反小者

肥人脉細欲絕者

瘦人脉躁者

人脈本滑利而反澁者

人脈本長而反短者

人尺脈上應寸口太遲者

溫病三四日未汗脈太疾者

溫病脈細微而往來不快胃中閉者

溫病發熱甚脈反小者

病甚脈往來不調者

溫病腹中痛下痢者

溫病汗不出出不至足者

病瘧腰脊強急瘕瘕者

病心腹脹滿痛不止脉堅大洪者

痢血不止身熱脉數者

病腹滿四逆脉長者

熱病七八日汗當出反不出脉絕者

熱病七八日不汗出躁狂口舌焦黑脉反細弱

者

熱病未汗出而脉大盛者

熱病汗出而脉未盡往來轉大者



病咳嗽脉數身瘦者

暴咳嗽脉散者

病咳形肥脉急甚者

病嗽而嘔便滑不禁脉弦欲絕者

病諸嗽喘脉沉而浮者

病上氣脉數者

病肌熱形瘦脫肛熱不去脉甚緊急者

病腸癖轉筋脉極數者

病中風痿疾不仁脉緊急者

病上喘氣急四匝脉澁者

病寒熱痰癍脉大者

病金瘡血不止脉大者

病墜損內傷脉小弱者

病傷寒身熱甚脉反小者

病厥逆汗出脉虛而緩者

病洞泄不下食脉急者

病腸辟下白膿者

病腸辟下膿血脉懸絕者

病腸澼下膿血身有寒脉絕者

病咳嗽脉沉堅者

病腸中有積聚脉虛弱者

病水氣脉微而小者

病水脹如鼓脉虛小澁者

病泄注脉浮大而滑者

病內外俱虛臥不得安身冷脉細微嘔而不入

食者

病冷氣上攻脉逆而澁者

卒死脉堅而細微者

熱病三五日頭痛身熱食如故脉直而疾者八日

久病脉實者

又虛緩虛微虛滑弦急者

卒病脉弦而數者

凡此凶脉不可治也

察聲色形證決死法第四十九

凡人五臟六腑榮衛關竅宜平生氣血順度循環無

終是爲不病之本若有缺絕則禍必來矣要在臨病之時存神內想息氣內觀心不妄視著意精察方能通神明探幽微斷死決生千無一誤其證兆具之於後

黑色起於耳目鼻上漸入於口者

赤色見於耳目額已五日者

黑白色入口鼻日中已五日者

黑或如馬肝色望之如青近則如黑者

張口如魚出氣不反者

循摸衣縫者

妄語錯亂及不能語者惟熱病無妨

尸臭不可近者

面目直視者

肩息已一日者

面青人中反已三日者

面無光牙齒黑者

面青目黑者

面白目黑已十日者

面赤眼黃者

面黑目白已八日者

面青目黃已五日者

眉系傾已七日者

齒忽黑色已三十日者

髮直已十五日者

遺尿不覺已五六日者

唇口乍乾黑者

爪中青黑色者

頭日久痛卒視不明者

舌卷卵縮者

面黑直視者

面青目白者

面黃目白者

面目俱白者

面目青黑者

面青唇黑者

髮如麻喜怒不調者



髮肩如衝起者

面色黑脇滿不能反側者

面色蒼黑卒腫者

掌腫無紋臍腫出囊莖俱腫者

手足爪甲肉黑色者

汗出不流者

唇反人中滿者

陰陽俱絕目匡陷者

五臟內外絕神氣不守其聲嘶者

陽絕陰結精神恍惚撮空裂衣者

陰陽俱閉夫音者

榮衛耗散面目浮腫者

心絕於腎肩息回眄目直已一日者

肺絕則氣去不反口如魚口已三日者

骨絕腰脊痛腎中重不可反側足膝後平已五

日者

腎絕大便赤澁下血耳乾腳浮舌腫已六日者

又足腫九日者

脾絕口冷足腫脹泄不覺已十二日者

筋絕魂驚虛恐手足爪甲青呼罵不休已八九

日者

肝絕汗出如水恐懼不安伏臥目直面青已八

日者

胃絕齒落面黃已七日者

凡此察聽之更須詳酌者矣

華氏中藏經卷中終

華氏中藏經卷下

漢 譙 郡 華 陀 元 化 撰

療諸病藥方六十道

萬應圓

甘遂

兩三

芫花

兩三

大戟

兩三

大黃

兩三

三稜

兩三

巴豆

和二

乾漆

炒二兩

蓬朮

兩二

當歸

兩五

桑皮

兩二

礪砂

兩三

澤瀉

兩八

山梔仁

兩二

檳榔

兩一

木通

兩一

雷丸

兩一

呵子

兩一

黑牽牛

兩五

五靈脂

兩五

皂角

皮七

定去

右件二十味剉碎洗淨入米醋二斗浸三日入銀器或石器內慢火熬令醋盡焙乾焦再炒爲黃色存性入後藥

木香

兩一

丁香

兩一

肉桂

去皮兩一

肉豆

兩一

白朮

兩一

黃芪

兩一

沒藥

兩一

附子

去皮兩一

臍炮

茯苓

兩一

赤芍藥

兩一

川芎

兩二

牡丹皮

兩二

白牽牛

兩二

乾姜

兩二

陳皮

兩二

芸臺

炒兩二

地黃

兩三

鼈甲

醋炙兩三

青皮

兩三

南星

煮軟兩二

切焙水

右二十味通前共四十味同杵羅爲末醋煮麩糊

爲丸如菜豆大用度謹具如左合時須在一淨室  
中先嚴潔齋心滌慮焚香精誠懇諸方聖者以助  
藥力尤効速也

結胃傷寒用油漿水下七圓當逐下惡物如人行  
二十里未動再服

多年積結淹食癥塊臨臥水下三圓至五圓每夜  
服之病即止如記得因傷物作積即隨所傷物下

七圓小兒  
老人勿服

水氣通身腫黃者茯苓湯下五丸日二服水消爲

度如要消酒進食生姜湯下一丸

食後腹中一切痛醋湯下七丸

膈氣噎病丁香湯下三丸

夜一服

因傷感勞鼈甲湯下七丸

日三服漸安減服

小腸疝癖氣茴香湯下三丸

大小便不通蜜湯下五丸

未通加至七丸

九種心痛茱萸湯下五丸

立止

尸注走痛木瓜湯下三丸

脚氣石楠湯下五丸

每日食前服



卒死氣未絕小便化七丸灌之立活

產後血不行當歸酒下三丸

血暈血迷血盡血痢血脹血刺血塊血積血瘀血  
癥並用當歸酒下二丸逐日服

難產橫倒榆白皮湯下二丸

胎衣不下燒稱鮪通紅以酒淬之帶熱下二丸惟  
孕婦患不可服產急難方可服之

脾瀉血痢乾姜湯下一丸

赤白痢甘草乾姜湯下一丸

赤痢甘草湯下一丸

白痢乾姜湯下一丸

胃冷吐逆并反胃吐食丁香湯下二丸

卒心腹痛不可忍者熱醋鹽湯下三丸

如常服一丸臨臥茶清下

五爛疾牛乳下一丸

每日服二

如發瘧時童子小便酒下十丸化開灌之吐利即

愈其効如神

療萬病六神丹

雄黃一兩研

礬石一兩燒

巴豆一兩去皮

附子一兩炮

藜蘆三兩

硃砂二兩別研

一兩  
為衣

右為末煉蜜為圓如小豆大一等作黍米大男子  
百疾以飲服二丸小兒量度與小者服得利即差  
安息香丸治傳屍肺痿骨蒸鬼疰卒心腹疼霍亂吐  
瀉時氣瘴瘧五利血閉瘰癧疔腫驚邪諸疾

安息香

木香

射香

犀角

沉香

丁香

檀香

香附子

訶子

硃砂

白朮

葦撥已上各一兩

乳香

龍腦

蘇合香

已上各半兩

右爲末煉蜜成劑杵一千下圓如桐子大新汲水化下四圓老幼皆一圓以絳囊子盛一圓彈子大懸衣辟邪毒翹翹甚妙合時忌雞犬婦人見之

明月丹治傳尸勞

雄黃半兩

兔糞二兩

輕粉一兩

木香半兩

天靈蓋

一兩

鼈甲一個

大者去裙

爛醋炙  
焦黃

右爲未醇酒一大升大黃一兩熬膏入前藥末爲圓如彈子大硃砂爲衣如是傳尸勞肌瘦面黃嘔吐血咳嗽不定者是也先燒安息香令烟起吸之不嗽者非傳尸也不可用此藥若吸烟入口咳嗽不能禁止者乃傳尸也宜用此藥五更初勿令人知以童子小便與醇酒共一盞化一圓服之如人行二十里上吐出蟲其狀若燈心而細長及寸或如爛李又如蝦蟇狀各不同如未効次日再服以應爲度仍須初得血氣未盡精神未亂者可用之

地黄煎解勞生肌肉進食活血養氣

生地黄汁五升

生杏仁汁一升

薄荷汁一升

生藕汁一升

鵝梨汁一升

法酒二升

白蜜四兩

生姜汁一升

已上同於銀石器中慢火熬成膏却入後藥

柴胡四兩

焙去蘆

木香四兩

人參二兩

白茯苓

二兩

山藥二兩

柏子仁

二兩

遠志二兩

心去

白朮二兩

桔梗二兩

枳實二兩

炒

秦艽三兩

去蘆

麝香二錢

另研

熟地黄四兩

右末入前藥膏中和再入臼中杵三二千下圓如  
桐子大每服食藥用甘草湯下二十圓食後日三  
服安即住服

起蒸中央湯

黃連五兩

右咬咀以醇酒二斗同熬成膏每夜以好酒化下  
彈子大一圓汗出爲度仍服補藥射臍圓

補藥射臍圓

射一枚燒灰

地黃洗

地骨皮

山藥

柴胡各一兩

白朮□□

活鱉一箇

重二斤者佳

右將鱉入醇酒一方煮令爛熟研細入汁再熬膏入末圓如桐子大酒服二十圓日二夜一蒸謂骨蒸也氣血相搏久而瘦弱遂成勞傷肉消毛落妄血喘咳者是也宜以前法治之

太上延年萬勝追魂散

人參去蘆

柴胡去苗

杏仁去皮共



天靈蓋

一美子  
兩

蜀椒

分一

桃柳心

一握  
小

右爲末童子小便一升末一兩坩中煎令熟空心日午各進一服經五日効

醉僊丹主偏枯不遂皮膚不仁

麻黃一升

去節水者去沫焙乾作末

南星七箇

大者

大附子三箇

黑者

地龍七條

去土

右除麻黃外先末之次將麻黃末用醇酒一方熬成膏入末圓如彈子大每服食後臨睡酒化一圓汗出爲度偏枯不遂皮膚不仁皆由五藏氣虛風

寒暑濕之邪蓄積於中久而不散乃成疾焉以前  
法主之

靈烏丹治一切冷疾疼痛麻痺風氣

川烏一斤

河水浸七日換水浸  
去皮去切片乾之

牛膝二兩

酒浸  
焙

何首烏四兩

制如川  
烏法

右爲末煉蜜圓如桐子大硃砂爲衣空心酒下七  
圓漸加至十圓病已即止

扁鵲玉壺丹駐顏補煖祛萬痛

硫黃一斤

以桑灰淋濃汁五斗煮硫黃令伏以  
火煨之研如粉搗一坵坑子深二寸

許投水在裏候水清取調硫黃末稀稠得所磁  
器中煎乾用鐵一箇上傳以砂砂上鋪紙鐵下  
以火煨熱即取硫黃滴  
其上自然色如玉矣

右以新炊飲爲丸如麻子大空心食前酒下十圓

葛元真人百補搆精圓

熟地黄四兩

山藥二兩

五味子六兩

菴蓉三兩酒浸一宿

牛膝二兩酒浸

山茱萸一兩

澤瀉一兩

茯苓一兩去皮

遠志一兩去心

巴戟天一兩去心

赤石脂一兩

石膏一兩

柏子仁一兩炒

杜仲三兩去皮剉碎浸火炒令絲斷

右爲末煉蜜圓如桐子大空心溫酒下二十圓男  
子婦人皆可服

澀精金鎖丹

韭子一升

酒浸三宿濾出  
焙乾杵爲末

右用酒糊爲圓如桐子大硃砂爲衣空心酒下二  
十圓

療百疾延壽酒

黃精四觔

天門冬三觔

松葉六觔

蒼朮四觔

枸杞子五升

右以水三碩煮一日取汁如釀法成空心任意飲之

交藤圓駐顏長算祛百疾

交藤根一觔

紫色者河水浸七日  
竹刀刮去皮曬乾

茯苓五兩

牛膝二兩

右爲末煉蜜搜成劑杵一萬下圓如桐子大紙袋盛之酒下三十圓空心服久服延壽忌猪羊肉

天仙圓補男子婦人虛乏

天仙子

五靈脂

各五兩

右炒令焦黑色杵末以酒糊爲圓如菜豆大食前  
酒服十五圓

左慈真人

一作善養

千金地黃煎

生地黃一秤

取汁於石器中熬成膏入熟地黃末看硬軟劑杵千下

右圓如桐子大每服二十圓空心服久服斷慾神  
仙不死

取積聚方

輕粉

粉霜

硃砂

各半兩

巴豆霜

二錢半

右同研勻煉蜜作劑旋圓如麻子大生姜湯下三

圓量虛實加減

治癥瘕方

大黃

濕紙  
裹煨

三稜

濕紙裹  
煨熱剉

硼砂  
研

乾漆

炒令  
烟盡

巴豆

去皮  
出油

已上各一兩爲末醋一方熬成膏入後藥

木香

丁香

枳實

麩炒  
去穰

桂心

各一  
兩

右爲末入前項膏子和成劑杵干下爲圓如菘豆  
大飲服三五圓食後服

通氣阿魏圓治諸氣不通胃背痛結塞悶亂者悉主

之

阿魏

兩二

沉香

兩一

桂心

兩半

牽牛末

兩二

右先用醇酒一升熬阿魏成膏入藥末爲圓櫻桃  
大硃砂爲衣酒化一圓

治尸厥卒痛方尸厥者謂忽如醉狀肢厥而不省人  
事也卒痛者謂心腹之間或左右脇下痛不可忍俗  
謂鬼箭者是

雄黃

研二兩

硃砂

研二兩



右二味再同研勻用大蒜一頭濕紙裹煨去紙杆  
爲圓櫻桃大每服一圓熱酒化下

鬼哭丹主腹中諸痛氣血凝滯飲食未消陰陽痞隔  
寒熱相乘搏而爲痛宜以此方主之

川烏

十四箇生

硃砂

一兩

乳香

一分

右爲末以醋一盞五靈脂末一兩煮糊和圓如桐  
子大硃砂爲衣酒下七圓男子溫酒下女人醋湯  
下

治心痛不可忍者

木香

蓬朮

各一兩

乾漆

一分炒

右爲末每服一錢熱醋湯調下入口立止

取長蟲兼治心痛方

大棗

二十一箇去核

綠礬

一兩作二十一塊子填棗中麩裏燒紅去麩

雷丸

七箇

輕粉

一錢

木香

一錢

丁香

一錢

水銀

半兩入鉢半兩溶成砂子

右爲末取牛肉二兩車脂一兩與肉同剉令爛米

醋一升煮肉令成膏入藥同熬硬軟得所入臼中

杵三二千下圓如酸棗大圓時先以緋線一條圓

在藥中留二尺許作系如有長蟲者五更初油漿  
水吞下一圓存線頭勿令吞盡候少頃心中痛線  
動即急拽線令藥出則和蟲出若心氣痛不可忍  
者熱醋湯化下一圓立止

治蟲毒方

水銀

蜜陀僧

黃丹

輕粉

大黃

丁香

訶子

雄雀糞

各一兩

右爲末每服二錢用麪半兩共水和成油餅食之  
又法作碁子入漿水煮熱食之

破棺丹治陰厥面目俱青心下硬四肢冷脉細欲絕者

硫黃

一兩無灰酒煮三日三夜如耗丹砂

一兩

細

右以酒煮糊爲圓如雞頭大有此病者先於淨室中勿令人知度病人長短掘一地坑子深一尺以來用苜蓿火燒令坑子極熱以醋五升沃令氣出內鋪衣被蓋坑以酒化下一丸與病人服之後令病人臥坑內蓋覆少時汗出即扶病者令出無風

處蓋覆令病人四肢溫心下軟即漸去衣被令通風然後看虛實調補

再生圓起厥死猶暖者

巴豆一兩去皮研

硃砂一兩細研

麝香半兩研

川烏共十四箇為末

大黃一兩炒取末

右件再同研勻煉蜜和圓如桐子大每服三圓水化下折齒灌之立活亦療關隔結胃極効

救生圓治卒死

大黃四兩

輕粉半兩

硃砂一兩

雄黃一分

巴豆

七箇去皮  
細研取霜

右爲末以鯢膽汁和圓如雞頭大童子小便化開  
一圓幹開口灌之內大葱一寸許入鼻中如人行  
五七里當吐出涎即活

治脾厥吐瀉霍亂

里附子

炮去皮  
臍八破

乾姜

炮

甘草

炙

肉苳

各一兩

右爲末水半升末四錢

一錢作

棗七箇姜一分

一錢作

同煎去半溫服連進三服

三生散起卒死兼治陰盛四逆吐瀉不止

草烏七箇

厚朴一尺

甘草三寸並生用

右爲末水一中盞末一錢棗七箇煎七分服重者灌之

起卒死

蔥蔥根二兩

瓜蒂一分

丁香十四粒

右爲末吹一字入鼻中男左女右須臾自活身冷強厥者勿活

浴腸湯治陽厥發狂將成疸

大黃

四兩濕紙裹煨

大青葉

梔子仁

甘草

各一兩炙

右爲末水五升末四兩煎減二升內朴硝五合再熬去一升取汁二升分四服量虛實與之大瀉爲度如喜水即以水澆之畏水者勿與喫大忌

### 破黃七神丹

朴硝

二觔

硃砂

五兩

大黃

七兩

甘遂

二兩

山梔

二兩

輕粉

一兩

豉

半觔以絹袋盛之

右七味以水二斗熬令水盡除去甘遂豉梔子大黃只取朴硝硃砂輕粉爲末以水浸豉汁研勻後



入末三味同和煮糯米糊爲圓如彈子大新水化  
一圓吐瀉爲度

三黃圓治三疳吐血諸黃症

黃連

三兩

黃芩

二兩

大黃

一兩

右爲末煉蜜爲圓如桐子大食後溫水下十五圓  
量虛實加減服

通中延命元冥煮硃砂法活尿血開擁塞解毒治一  
切熱病風氣腳毒蠱毒

硃砂

五兩

朴硝

半斤秤水煮七遍每遍用水三升水盡爲度取霜再入水二

升

蘇木二兩

大黃五兩

鬱金三兩

山梔二兩

人參二兩

桑皮二兩

甘草五兩

右件同熬水盡爲度只用硃砂去餘藥杵末煉蜜  
圓桐子大每服二十圓飲下可疎諸毒尤妙

治暴熱毒心肺煩而嘔血方

大黃

二兩爲末以地黃汁拌勻濕即焙乾

右爲末每服二錢地黃汁調下以利爲度甘草湯  
亦得

治吐血方

蛤粉

四兩

硃砂

一兩

右爲末新汲水調下五錢未已再服止卽已

治中暈死心下猶暖起死方

右令病者仰面臥取溫水不住手澆淋臍中次以童子小便合生地黃汁灌之自活禁與冷水只與溫熟水飲之

玉霜膏治一切熱毒喉閉

朴硝

一觔

牙硝

半觔

鵬砂

四兩

礬石

三兩

右爲末火鎔成汁築一地坑子令實傾入盆覆一

夕取杆爲末入龍腦二兩研勻新汲水半盞合生  
蜜調一錢小兒量與服

百生方救百物入咽喉鯁欲死者

茯苓皮去

貫衆

甘草

右件各等分爲末每服一錢米飲調一分立効  
治喉閉悶氣欲死者

右取乾漆燒令烟出竹筒子吸烟吞之立効  
治漏胎胎損方

川芎

艾葉

各一兩炒

阿膠

炒

白茯苓

□□

右末之糯米飲調下二錢匕日七服仍食糯米粥  
養之

治婦人血崩方

枳殼

一錢  
麩炒

蛇黃

二錢燒醋  
淬十四次

右爲末醋湯調下一錢匕連三服効

治婦人血閉方

乾漆

二兩  
燒

生地黄汁五升

右熬成膏酒化棗大許空心服

三不鳴散治小便不通及五淋

取水邊燈下道邊螻蛄各一箇三處取三箇令相咬取活者一

箇如後法射香酒食空下

右內於瓶中封之令相噬取活者焙乾餘皆爲末

每服一錢匕溫酒調服立通

餘皆二字恐誤

### 甘草湯解方藥毒

甘草 一十二兩

右件剉碎水二斗煎至一斗取清溫冷得所服仍  
盡量服

### 治溺死方

取石灰三石露首培之令厚一尺五寸候氣出後以苦葫蘆穰作末如無用瓜蒂

右用熱茶調一錢吐爲度省事後以糜粥自調之  
治縊死方

先令人抱起解繩不得用刀斷扶於通風處高首  
臥取蔥蔥根末吹入兩鼻中更令親人吹氣入口  
候噴出涎即以礬石末取丁香煎湯調一錢匕灌  
之

槐子散治久下血亦治尿血

槐用中黑子一升合槐花二升同炒焦

右件爲末每服二錢用水調下空心食前各一服  
病已止

治腸風下血

荆芥穗

地黄

各二兩

甘草

兩

右爲末每服一錢溫酒調下食後日三夜一

治暴喘欲死方

大黃

兩一

牽牛

炒二兩

右件爲細末每服二錢蜜水調下立愈治上熱痰



喘極効若虛人肺虛冷者不可用

大聖通神乳香膏貼諸毒瘡腫發背癰疽

乳香

兩一

沒藥

兩一

血竭

兩一

黃蠟

兩一

黃丹

兩二

木鼈

去殼兩二

烏魚骨

兩二

海桐皮

兩二

不灰木

兩四

歷青

兩四

五靈脂

兩二

麝香

錢二

膩粉

五十

箇子

右並爲末用好油四兩熬令熱下藥末熬不住手攪之令黑色滴水中成珠即止

水澄膏治病同前

井泉石

白及

各一兩

龍骨

黃蘗

鬱金

各半兩

黃蜀葵花

一分

右六味並爲末每服二錢新汲水一盞調藥打令  
勻伺清澄去浮水攤在紙花上貼之腫毒發背皆  
治

更麩膏治一切不測惡瘡欲垂□□

南星

一兩

半夏

七兩

巴豆

五箇  
去殼

麝香

錢半

右爲細末取臘月猪脂就膏令如不痛瘡先以鍼刺破候忍痛處使以兒乳汁同調貼之

千金膏貼一切惡瘡癰癤

定粉

南粉

膩粉

黃丹各一

右爲末入麝香一錢研勻油調得所成膏貼

定命圓治遠年日近一切惡候漏瘡

此藥爲末熔開蠟就湯內爲條

如布鍼大入內雲母膏貼之

雄黃

乳香各一

巴豆

二十一粒去皮不去油

右研如粉入白麵三錢水和圓如小豆或小麥粒

大兩頭尖量病淺深內瘡中上用乳香膏貼之効  
服雲母膏尤佳

麝香圓治一切氣漏瘡

射香分一

乳香分一

巴豆

十四粒  
去皮

右爲末入棗肉和成劑圓作鋌子看瘡遠近任藥  
以乳香膏貼之以効爲度

香鼠散治漏瘡

香鼠皮

四十九箇河  
中花背者是

龍骨

半兩

蝙蝠

二箇用  
心肝

黃丹

分一

射香

錢一

乳香

錢一

沒心草

燒一兩

右入珀合中泥固濟炭三觔煨火終放冷爲末用  
葱漿水洗淨以藥貼之立効

定痛生肌肉方

胭脂

分一

血竭

兩一

乳香

分一

寒水石

燒三兩

右爲末先以溫漿水洗過拭乾傅瘡甚妙  
又定痛生肌肉方

南星

錢一

乳香

錢一

定粉

兩一

龍骨

兩半

不灰木

一兩燒過

右爲末先以溫漿水洗瘡口以軟帛拭乾傅之

治白丁增寒喘急昏冒方

葶藶

大黃

各一兩

桑白皮

茯苓

各二兩

檳榔

郁李仁

漢防己

各三分

右件爲末每服三錢蜜水調下以疎下惡物爲度

又取白丁方

鉛霜

方一

膽礬

粉霜

各一錢

蜈蚣

一條

右件爲末先刺令血出內藥米心大以醋麵餅封

口立愈

治赤丁方

黃連

大黃

各一兩

右件爲末以生蜜和丸如桐子大每服三十九溫水下以利爲度

又取赤丁方

杏仁

七箇生用

右件嚼爛漱之令津滿口吐出綿濾汁入輕粉少許調勻以雞羽掃之

治黃丁方

巴豆七箇去膜

青州棗

七箇去核安巴豆棗內以麩裹煨通赤

右件爲末以礪砂醋作麵糊爲圓如菜豆大每服五圓至十圓米飲下以利爲度

又取黃丁方

黃蘗

二兩

鬱金

半兩

右件爲細末以雞子清調雞羽掃上

治黑丁方

兔絲子

菖蒲



右二味等分爲末酒浸取汁掃丁上更服腎氣圓  
補之

治青丁方

穀精草

蟬殼各一兩

蒼朮五兩

右爲末每服一錢水調服食前仍以鍼刺丁出用  
桑柴灰汁洗之立効